

তোমাকে পাওয়ার জন্যে, হে স্বাধীনতা

শামসুর রাহমান

তোমাকে পাওয়ার জন্যে, হে স্বাধীনতা,

তোমাকে পাওয়ার জন্যে

আর কতবার ভাসতে হবে রক্তগঙ্গায়?

আর কতবার দেখতে হবে খাণ্ডবদাহন?

তুমি আসবে বলে হে স্বাধীনতা,

সাকিনা বিবির কপাল ভাঙল,

সিঁথির সিঁদুর মুছে গেল হরিদাসীর।

তুমি আসবে বলে হে স্বাধীনতা,

শহরের বুকে জলপাইয়ের রঙের ট্যাংক এলো

দানবের মতো চিৎকার করতে করতে

তুমি আসবে বলে, হে স্বাধীনতা,

ছাত্রাবাস, বস্তি উজাড় হলো। রিকয়েললেস রাইফেল

আর মেশিনগান খই ফোটালো যত্রতত্র।

তুমি আসবে বলে ছাই হলো গ্রামের পর গ্রাম।

তুমি আসবে বলে বিধবস্ত পাড়ায় প্রভুর বাস্তুভিটার

ভগ্নস্থপে দাঁড়িয়ে একটানা আর্তনাদ করল একটা কুকুর।

তুমি আসবে বলে হে স্বাধীনতা

অবুঝ শিশু হামাগুড়ি দিল পিতামাতার লাশের উপর।

তোমাকে পাওয়ার জন্যে, হে স্বাধীনতা, তোমাকে পাওয়ার জন্যে

আর কতবার ভাসতে হবে রক্তগঙ্গায়?

আর কতবার দেখতে হবে খাণ্ডবদাহন।

স্বাধীনতা, তোমার জন্যে থুথুরে এক বুড়ো

উদাস দাওয়ায় বসে আছেন-তাঁর চোখের নিচে অপরাহ্নের

দুর্বল আলোর ঝিলিক, বাতাসে নড়ছে চুল।

স্বাধীনতা তোমার জন্যে

মোল্লাবাড়ির এক বিধবা দাঁড়িয়ে আছে

নড়বড়ে খুঁটি ধরে দক্ষ ঘরের।

স্বাধীনতা, তোমার জন্যে

হাডিসার এক অনাথ কিশোরী শূন্য থালা হাতে

বসে আছে পথের ধারে।

তোমার জন্যে,
সগীর আলী, শাহবাজপুরের সেই জোয়ান কৃষক,
কেষ্ট দাস, জেলেপাড়ার সবচেয়ে সাহসী লোকটা,
মতলব মিয়া, মেঘনা নদীর দক্ষ মাঝি,
গাজী গাজী বলে যে নৌকো চালায় উদ্দাম ঝড়ে
রুস্তম শেখ, ঢাকার রিক্সাওয়ালা, যার ফুসফুস
এখন পোকাকার দখলে
আর রাইফেল কাঁধে বনে জঙ্গলে ঘুরে বেড়ানো
সেই তেজি তরুণ যার পদভারে
একটি নতুন পৃথিবীর জন্ম হতে চলেছে—
সবাই অধীর প্রতীক্ষা করছে তোমার জন্যে, হে স্বাধীনতা।

পৃথিবীর এক প্রান্ত থেকে অন্য প্রান্তে জ্বলন্ত
ঘোষণার ধ্বনি-প্রতিধ্বনি তুলে,
নতুন নিশান উড়িয়ে, দামামা বাজিয়ে দিগ্বিদিক
এই বাঙলায়
তোমাকে আসতেই হবে, হে স্বাধীনতা।

কবি-পরিচিতি

কবি শামসুর রাহমান ১৯২৯ সালের ২৩শে অক্টোবর পুরান ঢাকার ৪৬ নম্বর মাহতটুলিতে জন্মগ্রহণ করেন। তাঁর পৈতৃক বাড়ি তৎকালীন ঢাকা জেলার রায়পুর থানার পাড়াতলী গ্রামে। কবির পিতা মোখলেসুর রহমান চৌধুরী এবং মাতা আমেনা খাতুন। তিনি ঢাকার পোগোজ স্কুল থেকে ম্যাট্রিকুলেশন (১৯৪৫) করেন। পরে ঢাকা বিশ্ববিদ্যালয়ে ইংরেজি বিষয়ে অনার্স নিয়ে ভর্তি হলেও পরীক্ষা দেননি; ১৯৫৩ সালে বি.এ. (পাস কোর্স) পাস করেন। ১৯৪৩ সালে তার প্রথম কবিতা ‘উনিশ শ’ ‘উনপঞ্চাশ’ প্রকাশিত হয় নলিনীকিশোর গুহ সম্পাদিত ‘সোনার বাংলা’ পত্রিকায়। ১৯৬০ সালে শামসুর রাহমানের প্রথম কাব্যগ্রন্থ ‘প্রথম গান দ্বিতীয় মৃত্যুর আগে’ প্রকাশ পায়। এরপর বহু কাব্যগ্রন্থ তিনি রচনা করেন। তাঁর উল্লেখযোগ্য কাব্যগ্রন্থাবলি হলো: ‘রৌদ্র করোটিতে’ (১৯৬৩), ‘বিশ্বস্ত নীলিমা’ (১৯৬৭), ‘নিজ বাসভূমে’ (১৯৭০), ‘বন্দী শিবির থেকে’ (১৯৭২), ‘ইকারুসের আকাশ’ (১৯৮২), ‘মাতাল ঋত্বিক’ (১৯৮২), ‘উ ডট উটের পিঠে চলেছে স্বদেশ’ (১৯৮৩), ‘এক ফোঁটা কেমন অনল’ (১৯৮৬), ‘দেশদ্রোহী হতে ইচ্ছে করে’ (১৯৮৬), ‘বুক তার বাংলাদেশের হৃদয়’ (১৯৮৮), ‘স্বপ্নে ও দুঃস্বপ্নে বেঁচে আছি’ (১৯৯৯), ‘অন্ধকার থেকে আলোয়’ (২০০৬) ইত্যাদি। এগুলো ছাড়া তিনি অনেক গদ্যগ্রন্থ রচনা করেন। ১৯৬৯ সালের ২০ জানুয়ারি তিনি রচনা করেন ‘আসাদের শার্ট’ কবিতাটি। তাঁর লেখা ‘আসাদের শার্ট’ কবিতাটির পিছনে রয়েছে পুলিশের গুলিতে নিহত আসাদের শার্ট উচুতে তুলে ধরে প্রতিবাদী এক বিশাল মিছিলের মুখোমুখি হওয়া কবির তাৎক্ষণিক প্রতিক্রিয়া। পরে প্রেসিডেন্ট আইয়ুব খান পাকিস্তানে একটি সাধারণ ভাষা প্রচলনের প্রস্তাব দিলে এর তীব্র বিরোধিতা করে ৪০জন বাঙালি সাহিত্যিক শিল্পী ও সাংবাদিক যে বিবৃতি প্রকাশ করেন (৩১শে আগস্ট, ১৯৬৮), কবির ‘বর্ণমালা, আমার দুঃখিনী বর্ণমালা’ নামে

বিখ্যাত কবিতাটি রচনার অনুপ্রেরণা ছিল সেই প্রতিবাদ। বহির্বিশ্ব কবির কবিতায় ছায়া ফেলতে শুরু করে তার দ্বিতীয় কাব্য 'রৌদ্র করোটিতে' থেকে। 'বিক্ষস্ত নীলিমা' কবিতাগুলো আরও এক ধাপ এগিয়ে যান কবি তাঁর বহির্বিশ্ব-চেতনার বিকাশের পথে। ১৯৭০ সালে প্রকাশিত তাঁর 'নিজ বাসভূমে' কাব্য তিনি উৎসর্গ করেন আবহমান বাংলার শহিদদের উদ্দেশ্যে। 'বর্ণমালা, আমার দুঃখিনী বর্ণমালা', 'ফেব্রুয়ারি ১৯৬৯', 'পুলিশ রিপোর্ট', 'হরতাল', 'এ লাশ আমরা রাখব কোথায়'—এ কবিতাগুলির ছেঁছেছে লেগে আছে এক বিক্ষুব্ধ সময়ের ছাপ। ১৯৭১ সালে মুক্তিযুদ্ধ চলাকালে তিনি রচনা করেন তাঁর অত্যন্ত জনপ্রিয় কবিতা 'স্বাধীনতা তুমি', ও 'তোমাকে পাওয়ার জন্য, হে স্বাধীনতা'। যুদ্ধকালীন লেখা কবিতাগুলো মুক্তিযুদ্ধ শেষে 'বন্দী শিবির থেকে' নামে কলকাতা থেকে প্রকাশিত হয়। শামসুর রাহমান কবিতার বিষয় ও ভাষায় নিরন্তর পরীক্ষাপ্রবণ ছিলেন। তাঁর কবিতায় মৌলিকতার স্বাক্ষর স্পষ্ট। বাংলা কবিতার আধুনিকতার ধারায় নতুন মাত্রা যোগ করেছেন, সমকালকে ধারণ করেছেন এক সদাজঘাত সংবেদনশীলতায় এবং তাঁর আমৃত্যু অপরাহত কাব্যচর্চায় সহাবস্থান ঘটিয়েছেন অন্তর্জীবনের পাশাপাশি দৃশ্যমান বহির্জীবনের। বাংলাদেশের বাংলা কবিতার ক্ষুদ্র গণ্ডি অতিক্রম করে ও প্রাদেশিকতা ঘুচিয়ে তাকে তিনি যুক্ত করেছেন বাংলা কবিতার মূল স্রোতের সঙ্গে। ২০০৬ সালের ১৮ আগস্ট ঢাকায় এই কবির মৃত্যু হয়।

মূল বক্তব্য

স্বাধীনতাকে অর্জন করার জন্য এদেশের মানুষের নানা ত্যাগের কথা বলা হয়েছে। এই কবিতায় স্বাধীনতার জন্য বাঙালির যে অবদান তাকে কবি শামসুর রাহমান অসাধারণভাবে উপস্থাপন করেন। বাঙালির স্বাধীনতার জন্য বা স্বাধিকার অর্জনের জন্য অসংখ্য মানুষের রক্তের সাগর হয়েছে। স্বাধীনতার জন্য সাকিনা বিবির মতো নারীদের জীবনে দুর্ভাগ্য নেমে আসে, হরিদাসীরা বিধবা হয়ে যায়। শহরে জলপাই রঙের ট্রাঙ্ক এসেছিল। তারা ছাত্রাবাস ও বস্তিতে তাদের আক্রমণ চালায়। তাছাড়া রিকয়েললেস রাইফেল আর মেশিনগানের মাধ্যমে তারা অত্যাচার শুরু করে। শুধু শহর নয়, গ্রামের পর গ্রাম তারা ধ্বংস করে দেয়। গ্রামের সব ঘরবাড়ি বাস্তুভিটা ধ্বংস হয়। এমনকি পিতা-মাতার লাশের উপর অবুঝ শিশু হামাগুড়ি দিতে থাকে। স্বাধীনতার স্বপ্ন বৃদ্ধ বয়সের মানুষের মনেও থাকে। তিনি জীবনের বিকেলে বসে স্বাধীনতার জন্য কল্পনা করেন। পাকিস্তানিরা গ্রামের প্রশান্তি ভেঙেও অত্যাচার করে বলে মোল্লাবাড়িতে ঘরবাড়ি পুড়িয়ে দেয়, সেই বাড়ির বিধবা ঘরের নড়বড়ে খুঁটি ধরে দাঁড়িয়ে থাকে। কঙ্কাল দেহ নিয়ে এক অনাথ কিশোরী থালা হাতে রাস্তার পাশে বসে থাকে, তার মনেও স্বপ্ন থাকে স্বাধীনতার। শাহবাজপুরের যুবক কৃষক সগীর আলী জেলেপাড়ার সবচেয়ে সাহসী কেঁট দাস, মেঘনা নদীর দক্ষ মাঝি মতলব মিয়া যিনি গাজী গাজী বলে নৌকা চালান। ঢাকার রিকশাওয়ালা রুস্তম শেখ, আর তেজী তরুণ—যে রাইফেল কাঁধে নিয়ে বনে জঙ্গলে ঘুরে বেড়ান, এদের সবার একটাই স্বপ্ন স্বাধীনতা। সবার আকাঙ্ক্ষা বাংলার স্বাধীনতা অর্জন। তারা নতুন পতাকা উড়িয়ে দামামা বাজিয়ে পৃথিবীর এক দেশ থেকে অন্য দেশে বাংলার জন্য স্বাধীনতার আকাঙ্ক্ষার ঘোষণা করেন। এই কবিতায় উঠে এসেছে সর্বাত্মক মুক্তিযুদ্ধের ঘটনা, যার জন্য সর্বোচ্চ ত্যাগ স্বীকারে প্রস্তুত সর্বস্তরের মানুষ। আর সবাই যখন সর্বান্তকরণে প্রত্যাশা করে, তখন তখন দেশ স্বাধীন হবেই—এটাই কবির প্রত্যয়।